



TATA IBADAH

MINGGU HARI BUMI SEDUNIA

Minggu, 18 April 2021



1. Votum-Introitus-Tonggo

P. Riap ma hita jongjong!

Ibagas goran ni Naibata Bapa pakon Tuhan Jesus Kristus ampa Tonduy Napansing sitompa langit pakon tanoh on. Amen. "Ai barang ise ibagas Kristus, na tinompa na baru ma in. Domma salpu sisapari, tonggor ma, domma gabe na baru. Haleluya, Haleluya, Haleluya.

P+K *(Mandodingkon)* Haleluya, Haleluya, Haleluya

P. Martonggo ma hita. Ham Tuhan Naibata, Sitompa haganup na adong ibagas Jesus Kristus Tuhannami. Pujionnami do Ham na markuasa janah na marhotak i harajaon-Mu. Ham do Naibata Jahowa na marmulia janah pintor, Raja ni sagala raja na markuasa bani sagala na adong. Roh do nuan hanami marsombah hu Bamu bani Minggu Hari Bumi se-Dunia panorang on. Martarimakasih do hanami halani holong pakon hasintongan-Mu na totap talar i tonggah-tonggah ni dunia on. Ham Tuhan Sitompa sagala na dob adong pakon na adong nuan sonai na sihol adong ope, pujionnami do Ham janah irik padaskon tonggo hatarimakasihon nami halani sagala na dob ilayakkon Ham hubannami. Jalo Ham ma tonggo ampa parsombahonnami Ham Tuhan Naibata Alpa pakon Omega, Naibata na Pansing janah totap ronsi sadokah ni dokahni. Amen.

2. Doding Pujian "O, Naibata Sangap do Ham" (*Kj. 64. Bila Kulihat Bintang Gemerlapan*) O,

Naibata gok longang do uhurhu, Anggo huidah tinompa-Mu in
Ganupan bintang, hilap pakon longgur, Pataridahkon hasangapon-Mu
Ref. Mandoding au Tuhan mamuji Ham, O, Naibata, sangap do Ham
Mandoding au mamuji-muji Ham, O, Naibata, sangap do Ham
I juma 'ge i padang 'pa harangan, Mandoding manuk-manuk gok jenges
Pakpak ni dolog, 'ge bah pakon pamah, Mambaritahon sangap-Mu Tuhan
Ref. Mandoding au Tuhan mamuji Ham, O, Naibata, sangap do Ham
Mandoding au mamuji-muji Ham, O, Naibata, sangap do Ham

3. Hasasapan ni Dousa

P. Bani na pardingatan Minggu Hari Bumi se-Dunia sadari on, isadari hita do paboa bani pardalanan ni goluhta hurang ope hita mambere diri laho manramotkon ampa mansarihon tanoh on ampa na dong ijon ase boi totap dear janah jenges. Halani ai dear ma haganupan hita mangaku janah mansopotkon dousanta i lobei ni Tuhanta. Martonggo ma hita!

Roh do hanami nuan manrogop janah marsombah hu lobei-Mu Ham Tuhan Naibata paridop ni uhur bani ari na marsangap on, mangakuhon pakon mansopotkon dousa ampa hahurangannami hu Bamu. Tongtong do idodingkon

hanami pasal hagogohon ni kuasa-Mu bani ganup na tinompa-Mu, tapi do lang ibere hanami dirinami laho mamingkirkon ampa mansarihon na tinompa-Mu in. Ijin roh na masa na idompakkon hanami khususni bencana non alam pandemi Covid-19 pakon bencana alam banjir bandang bani piga-piga ianan, marhoru, gabe songgoton janah mabiar ma hanami. Hape masa pe haganup in boi do halani pangkorhon ni ulah ni jolma na lang manramotkon tanoh ampa pangisini. Ham Tuhan, marpanganju ma Ham bannami, sasp Ham ma dousa ampa panlanggaron nami in. Buhai janah rajai Ham ma uhurnami ase totap porsaya janah martenger ni uhur bani kuasa ampa hagogohon-Mu. Kuasa-Mu ma Tuhan ajamkononnami laho mangatasi ganup na masa in. Patotap Ham ma haporsayaonnami ase totap hanami marpangarapan dampak Ham ampa bani hagoluhan na totap na dob ipasirsir Ham bannami. Ibagas goran ni Anak-Mu Tuhan Jesus Kristus hanami martonggo. Amen.

Tangar anjaha haporsayai hita ma Hata ni Naibata, bagah-bagah pasal hasasapan ni dousanta: "Ia do pardearan pasaloseihon sagala dousanta, tapi seng pitah dousanta, tapi dihut do dousa ni haganup dunia on" (1 Joh.2:2).

Ibagas holong ni Naibata, domma isasap haganup dousanta. Halani ai, pataridahkon hita ma tanda-tanda ni pargoluhon na bayu. Hasangapon ma bani Naibata i babou.

P+K.Amen

4. Doding Haleluya No. 322:1+3

Durus darohni Jesus in i dolog Golgata,
Na paubahkon uhurmin, isasap dousamin
Isasap dousamin, isasap dousamin
Napaubahkon uhurmin, isasap dousamin.

Daroh-Ni na madurus in, margogoh do tongon
Gabe maluah bangsa-Mu, pansing homa tongtong
Pansing homa tongtong, pansing homa tongtong
Gabe maluah bangsa-Mu, pansing homa tongtong

5. Mambasa Psalmen 66:1-9

- P. Bani pambobai koor. Sada Psalm. Sada doding. Marolob-olob ma bani Naibata, nasiam haganup tanoh on.
- K. Dodingkon nasiam ma hamuliaon ni goran-Ni; sombahkon nasiam ma Bani puji-pujian na marmulia.
- P. Hatahon nasiam ma bani Naibata, "Banggalni in sagala horja-Mu! Pangkorhon ni timbul ni hagogohon-Mu, ningon do marsombah hu Bamu sagala munsuh-Mu.
- K. Ganup tanoh on marsombah do hu Bamu, sai dodingkononni do Ham, dodingkononni do goran-Mu.
- P. Roh anjaha tonggor nasiam ma pambahenan ni Naibata; gok kuasa do pambahenan-Ni dampak anak ni jolma.

- K. Ipaubah do laut gabe na horah, mardalan nahei sidea mandipari bah mardalan; ijai marmalas ni uhur do hita marhiteihon-Si,
- P. Na manrajai tongtong marhitei hagogohon-Ni, na mangkawahkon sagala bangsa marhitei panonggor-Ni, ase ulang mangenjeng halak panggeori.
- K. Puji ma, ale sagala bangsa, Naibatanami, pabogeihon nasiam ma puji-pujian Bani!
- P. Ia na mambahen hosahnami manggoluh, anjaha seng ilopas naheinami tartolsu. Amen.

6. Mandoding Haleluya No. 347:1-3

Batu gingging na toguh, Ham do batar-batarhin
 Na gogoh toguh do Ham, bai gilumbang tahan Ham
 Sai hudilo Jesus in, tolong au anakMu on
 Huparbois pe gogohkin, ronsi tangis au ijin,
 Naha pe hubaen ijin, seng boi tanggal dousangkin.
 Pitah bai ugah-Mu in, boi maluah au ijin.
 Seng adong haposankin, pitah bai silangMu in
 Bani hahurangan kin, Ham ma patorsahon in
 Anggo lang marhitei Ham, seng maluah au Tuhan

7. Hata Haporsayaon

- P. Saksihon hita ma haporsayaonta in, songon na sinaksihon ni haganup halak na porsaya bani sab tanoh on!
- P+K. Ahu porsaya bani Naibata Bapa, Pargogoh na so tarimbang, na manompa langit pakon tanoh on. Ahu porsaya bani Jesus Kristus, Anak ni Naibata na sasada in, in do Tuhanta, na tinubuhkon ni si Maria sanggah nape haliaban, marhitei Tonduy Na Pansing. Na manaron na parngit, bani panorang ni si Pontius Latus, iparsilangkon, matei anjaha itanom, turun hu nagori toruh. Mulak manggoluh humbani na matei bani ari patoluhon. Naik hu surga anjaha hundul i siamun ni Naibata Bapa, Pargogoh na so tarimbang in. Hunjai ma Ia mulak magira laho manguhumi halak na manggoluh pakon na dob matei. Ahu porsaya bani Tonduy Na Pansing, bani Kuria parsadaan na mapansing in, parsaoan ni sagala na mapansing in, bani hasasapan ni dousa, bani parpuhoon ni angkula, pakon bani hagoluhan na sadokah ni dokahni. Amen.

8. Acara Khusus

- Mambasa Tonah ni Pimpinan Sinode GKPS
- Refleksi
- Tingting
- Tonggo Pangapition

9. Doding Haleluya No. 406:1-3

Hatahononta diatei tupa ma, ai Negaranta tanoh na lambut
Laut bolag dologni pe ratah, talun jenges ampar do haganup
In haganupan pasu-pasu-Ni, simada kuasa Tuhan Naibata
In haganupan pasu-pasu-Ni, simada kuasa Tuhan Naibata
Sangah poltak mataniari in, martitialas bai sogodni in,
Morum mangerbang bunga-bunga in, irandu doding ni bossala in
In haganupan pasu-pasu-Ni, simada kuasa Tuhan Naibata
In haganupan pasu-pasu-Ni, simada kuasa Tuhan Naibata
Tanoh na gombur musim pe dear, torsa ganupan mambahen jagar
Jenges idahon damei do ijin, in ma tanohta hatubuhan in
In haganupan pasu-pasu-Ni, simada kuasa Tuhan Naibata
In haganupan pasu-pasu-Ni, simada kuasa Tuhan Naibata

10. Ambilan: Psalmen 106:1-5

11. Galangan

Prb. Paima iondoskon hita galanganta, tangar hita ma lobei Hata ni Naibata na gabe onjolan banta laho manggalang, aima na tarsurat bani: Psalmen 50:14: "Galangkon ma bangga ni uhur bani Naibata, anjaha galari ma bagah-bagahmu bani Sitimbulan in".

12. Tonggo Pakon Doding Galangan

Prb. Ham Tuhan Naibata Bapanami, paridop ni uhur, harohan ni sagala pasu-pasu. Tarimakasih ma isombahkon uhurnami hu Bamu halani hum Bamu do ijalo hanami pasu-pasu na gokan dear pakon na laingan. Bani panorang on isombahkon hanami do hu Bamu na gabe galangannami, dirinami pakon humbani hinadongannami na dob binere-Mu in. Pasu-pasu Ham ma galangan na sinombahkon nami on, gabe galangan na mapansing, na mambahen harajaon-Mu lambin marhataridahan i dunia on. Ungkab Ham ma uhurnami marhitei Tonduy-Mu, ase lambin ididah, ibotoh janah ihamalaskon uhurnami buei ni silayak-layak-Mu, na dob ijalo hanami pakon na sihol bereon-Mu ope hu bannami. Ajari Ham ma hanami laho mangondoskon galangannami na patut galangkonon nami hu Bamu. Jalo Ham ma galangan pakon tonggo elek-eleknami on, ibagas Jesus Kristus Tuhannami. Amen.

Prb+K (*Mandodingkon*) Haleluya No. 12:3

Tonduy, daging uhur ampa gogohniin.
Ulang bai na sambor, sai Bamu ma in!
Ningon gok Bamu ma au hinopkop-Mu.
Ase saud martuah au jabolon-Mu.

13. Tonggo Panutup

Prb. Ham Tuhan Naibata Bapanami, na i nagori atas. Malas do uhurnami bani na boi hanami marhasadaon bani Minggu Hari Bumi se-Dunia ibagas sadari on. Lambin paingat Ham ma hanami pasal tanggungjawab ampa horjanami selaku halak na porsaya na dob itobus Ham laho manramotkon tinompa-Mu in ase ulang hu hasedaon tapi ase dihut na tinompa in ampa tanoh on mambaritahon habanggalon ni kuasa-Mu. Pasu-pasu janah pargogohi Ham ma hanami kuria-Mu ase tetap mangarap janah marhaporsayaon hu Bamu. Pasu-pasu Ham ma homa sagala horja ni kuria-Mu, tarlobih na mambere diri laho manramotkon tanoh on ase marhiteihon ni ai tarambilan ampa marrarat harajaon-Mu. Maidop ma uhur-Mu, jalo Ham ma tonggonami on, ibagas Jesus Kristus Tuhannami.

14. Tonggo Ham Bapanami

Prb. Ham Bapanami na i nagori atas. Sai na papansing ma Goran-Mu. Sai roh ma harajaon-Mu. Sai saud ma harusuh ni uhur-Mu i nagori tongah on songon na i nagori atas. Bere Ham ma bannami sadari on hagoluhan ari-ari. Sasap Ham ma dousanami songon panasapnami bani dousa ni hasoman na mardousa dompak hanami. Ulang hanami bobai Ham hu parlajouan. Paluah Ham ma hanami humbani pangagou.

Prb+K. (*Mandodingkon*) Ai Ham do simada harajaon, pakon hagogohon ampa hasangapon sadokah ni dokahni. Amen.

15. Paingkatkon

Prb. Laho ma nasiam, janah “papansing nasiam ma Kristus Tuhan in ibagas uhurnasiam, tongtong ma nasiam sirsir patorangkon bani haganup halak na manungkun nasiam pasal onjolan ni pangarapan nasiam” (*1 Petrus 3:15*).

16. Pasu-pasu:

Prb. Jalo ham (hita) ma pasu-pasu humbani Tuhan Naibatanta:

Ipasu-pasu anjaha iparorot Tuhan Naibata ma ham (hita). Isondangkon Tuhan Naibata ma bohi-Ni hu bamu (hu banta) janah maidop ma uhur-Ni mangidah ham (hita). Idompakkon Tuhan Naibata ma bohi- Ni hu bamu (hu banta) janah ipasorap ma damei-Ni bani tonduymu (tonduyta bei). Amen.

Prb+K. (*Mandodingkon*) Amen...Amen...Amen

Refleksi:

"Ramotkon Hita ma Tanoh on"

Anggo puho ma hita, sihol mamungkah horja, roh ma sondangni mataniari
Mardeteng, milas mambahen lang tardogei be tanoh
Na ahapkon do ai tapi lang nabotoh naha mandompakkon ai
tanoh urah mando horah, suan-suanan pe melus ma

Nini halak na pentar domma menipis bahkan marlubang ma ozon
Hayu i harangan domma lambin roh otik ni halani itabai tangan-tanganni halak na
lang marosuh mangidah jenges tanoh on, ganup ai halani sihol bayak marhitei
mamboiskon ganup hayu na jenges janah maratah i atas ni dolog-dolog.
Hape paimahon sada hayu marbanggal das bani na martahun-tahun dokahni.
Hawa lambin roh milas ni mando torus
na hinan sejuk do sonari lambin roh milasni.
Es na kutub pe gabe marbah mambahen lambin roh naik ni ma permukaan ni laut.
Masa ma cuaca na ekstrem, lang tarsibar roh hamagouan na lang iharosuhkon hita.

Anggo maseda tanoh on seng tar-iankon be huja nari ma hita laho?
Dong do nani tanoh ampa ianan na legan banta laho manoruskon pargoluhan?
Nini hata bijak na gati itangar hita, "Jangan wariskan air mata tapi wariskanlah mata
air."

Tontu tugasta do laho manjaga ase dear tanoh on.
Boi mambere hagoluhan banta age bani ginomparta na laho roh.
Halani ai jaga janah ramot ma bahen tinompa ni Naibata in.

Ningon dingat ma hita paboa tanoh on Tuhan do Simadasi.
Lang boi hita maruhur-uhur laho mamakei ganup na dong on laho mansuhuni ganup
sura-suranta sandiri.
Martanggungjawab bani Tuhan do hita bani na manjaga tanoh on.

Gabe kuria na marbuah ma hita,
Mambere dampak bani hatotorsa ni hadearon ni pargoluhan i tanoh on
Sipanramotkon ma hita ase dear lingkunganata, ase sonang hita manggoluh.
Ulang gabe siparseda na dear hita, halani anggo domma maseda mahol ma
padearhon. Ai do pandiloon ni Tuhan banta bei aima manjaga ampa manramotkon
na dob tinompa-Ni in. Amen.